

Nabi Muhammad tokoh terunggul dunia



Bersama
Prof Dr Taufiq
Yap Yun Hin

Dalam buku bertajuk *The 100: A Ranking of The Most Influential Persons In History* ditulis Michael H Hart menyenaraikan kedudukan 100 orang paling berpengaruh dalam sejarah.

Dalam senarai itu, Nabi Muhammad SAW diletakkan pada kedudukan teratas sekali. Nabi Muhammad SAW dilahirkan di Makkah pada tahun 570 Masihi sebagai seorang anak yatim.

Baginda kemudian dibesarkan datuknya,

Abdul Motalib dan bapa saudaranya, Abu Talib. Pada awal kehidupan, Baginda bekerja sebagai pengembala kambing dan berniaga.

Nabi Muhammad SAW menerima wahyu dengan penurunan ayat al-Quran **Surah al-Alaq** pada usia 40 tahun sebelum dilantik sebagai nabi dan rasul.

Pada permulaan Islam di Makkah, hanya terdapat sekumpulan kecil saja pengikut Baginda. Pada tahun 622 Masihi, Nabi berhijrah bersama pengikutnya ke Madinah dan itu adalah permulaan Kalender Islam.

Di Madinah, Baginda berjaya menyatupadukan pelbagai suku kaum, membina serta meningkatkan kekuatan

politik dan agama. Nabi Muhammad SAW berjaya mengumpulkan 10,000 pengikut ke Makkah.

Baginda berjaya menawan Makkah dan menyatukan seluruh tanah Arab di bawah naungan Islam. Nabi Muhammad SAW adalah rahmat buat seluruh umat manusia.

Menerusi wahyu daripada Allah SWT, Nabi Muhammad SAW berjaya mengubah ketaatan buat manusia kepada penyembahan serta penyerahan diri semata-mata kepada Allah SWT.

Manusia menjadi bebas daripada penghambaan selain daripada Allah SWT. Itu adalah penghormatan terbesar bagi seluruh umat manusia.

Nabi SAW berjaya membebaskan minda manusia daripada kepercayaan tahayul dan penyembahan terhadap objek. Baginda meletakkan asas toleransi dalam kalangan manusia.

Selain itu, Baginda menjelaskan hak terhadap kehidupan anak, harta benda dan kehormatan orang bukan Islam yang tidak menentang Islam turut dijamin serta dilindungi.

Di kebanyakan negara Islam, warganegara bukan Islam dapat menikmati hidup aman damai dan bebas mengamalkan agama masing-masing.

Situasi itu sangat berlawanan dengan sikap beberapa negara yang melakukan pembersihan

etnik umat Islam. Perbuatan itu jelas melanggar prinsip kemanusiaan sejagat.

Nabi Muhammad SAW mempertahankan hak asasi tanpa mengira status sosial. Baginda juga memperkenalkan prinsip keimanan sebagaimana ucapannya ketika haji perpisahan (haji wada') dengan mengisytiharkan larangan ke atas pelanggaran terhadap kehidupan, harta benda dan penghormatan orang.

Prinsip itulah yang menjadi asas kepada Magna Charta (1215), Deklarasi Hak (1628), Undang-Undang Kebebasan Peribadi (1679), Piagam Hak Manusia dan Warganegara (1789) dan Pengisytiharan Hak Asasi

Manusia di seluruh dunia pada 1948.

Nabi Muhammad turut meningkatkan kepentingan etika dan moral dalam kehidupan manusia seperti bersikap sopan, jujur, setia dan mengeratkan ikatan sosial.

Baginda melarang terhadap tingkah laku negatif seperti berbohong, iri hati, pengkhianatan, perzinaan dan tidak menghormati ibu bapa. Hanya ketakwaan menjadi ukuran di sisi Allah SWT, tiada satu bangsa yang lebih unggul daripada yang lain.

Penulis ialah Presiden Persatuan Cina Muslim Malaysia (MACMA) dan profesor di Universiti Putra Malaysia (UPM)